

Gregorian: Propustiti priliku za reformu policije bilo bi tragično

Nakon skoro tri godine razgovora, sporazum o reformi policije je na dohvat ruke i bilo bi tragično propustiti ovu priliku, piše danas u novinskoj rubrici prvi zamjenik visokog predstavnika Raffi Gregorian.

U članku objavljenom u *Euroblicu*, najprodavanijem dnevnom listu u Republici Srpskoj, Raffi Gregorian uporedio je današnje stavove u pogledu reforme policije sa stavovima o reformi odbrane od prije tri godine.

“Da bi se pokrenula konstruktivna diskusija [o reformi odbrane], bilo je potrebno odbaciti mnoge strahove i dezinformacije. Smatralo se da su šanse da se dođe do sporazuma bile male”, piše prvi zamjenik visokog predstavnika. «Ja to znam. Bio sam tu”.

Prije stupanja na dužnost u Uredu visokog predstavnika, Raffi Gregorian je bio na funkciji političkog savjetnika za NATO u Bosni i Hercegovini i kopredsjedavajući Komisije za reformu odbrane.

“Danas Bosna i Hercegovina ima jedinstvene oružane snage koje su kompatibilne sa NATO-om. Ova zemlja je i članica NATO-vog program Partnerstvo za mir, što predstavlja prvu stepenicu na putu ka konačnom članstvu u NATO-u”, piše Raffi Gregorian. “Građani ostvaruju direktnu korist u smislu pojačane bezbjednosti, jer su njihovi politički lideri imali hrabrosti i viziju da postignu sporazum”.

“Kao i u slučaju reforme odbrane, sporazum o restrukturiranju policije će biti postignut jedino ako političari prevladaju strah i bojazan, nađu zajednički jezik i utvrde plan restrukturiranja”, nastavlja on.

“Reforma policije ima jedan temeljni cilj – načiniti od Bosne i Hercegovine bezbjedno mesto za sve njene građane. Niko ne može tvrditi ozbiljno da je trenutni aranžman idealan”, piše Raffi Gregorian. “Što prije bude postignut dogovor, to će se prije moći efikasno boriti protiv kriminala. Što prije do toga dođe, to će prije Bosna i Hercegovina krenuti naprijed na putu prema Evropskoj uniji”

“Ako politički lideri dorastu ovom izazovu, pomoći će da se snažnije zacrti put prema Sporazumu o stabilizaciji i pridruživanju sa Evropskom unijom”, zaključio je prvi zamjenik visokog predstavnika.

Tekst članka prvog zamjenika visokog predstavnika dostupan je na adresi www.ohr.int.